

TE HEHEURAA API

I neia i te piha neneiraa a Henere i Roto Miti i Utah nō te Ekalesia a Iesu Mesia i te Feia Mo'a i te Mau Mahana Hopea Nei. i Papeete, Tahiti, i te mau fenua Sotaiete, i te mau avae atoa. Te hoo e piti farane i te matahiti hoe.

Nu. 12

Ditema, 1915

Mat. 9

“E ua tupu hoi teie, no to Adamu faahema-raa-hia e te Diabolo, o mua hoi te Diabolo ia Adamu, ua orure mai hoi ia'u, i te na ôraa mai e, a horoa mai i to oe na hanahana, o to'u hoi ia mana; e ua faafariu ê atoa oia i te toru o te tufaa no te nuu i nia i te ra'i ra no to ratou tiamaraa, e ua hurihia ratou, e no reira e riro ai i te Diabolo e to'na ra mau melahi; e inaha, e vahi tei haapaohia nō ratou mai te mata-mua mai â, e o taua vahi ra o te po ia.”—Buka Fafau 28:10.

IESU TE MESIA.

I roto i te mau vea i mua nei e neneihia te hoê mau parau no Iesu, oia te Fatu ra ia Iesu Mesia. I roto i te avae Novema ua oti i te neneihia te hoê buka apî i parauhia “Iesu te Mesia.” Na te hoê Aposetolo o te Ekalesia nei o Iakobo Talamāgē (Dr. James Talmage) i papai i te reira. E faaauhia teie nei mau parau i roto i te Heheuraa Apî no te mau parau i papaihia i roto i taua buka apî ra.

.. OMUARAA PARAU.

E mea farii noa hia e te mau taata atoa e, i te haamataraa o te Tau Chirititiano ua fanau te taata ra Iesu i parauhia te Mesia, i roto i te oire ra i Betelahema i Iudea; Ua farii-atoa-hia te mau parau rahi o to'na fanauraa, e to'na oraraa i te pae tino, e to'na poheraa, aita rea e mârora i taua mau parau ra.

Te mârô puai noa nei râ te mau taata ra i nia i te parau ra e, O vai ra Oia? e Eaha ra Oia? Aita roa i tahoêhia te mau mana'o o te taata nei i nia i taua na parau rahi e piti.

I faaite mairâ e milioni e milioni te taata i pohe, e te faaite atoa nei e milioni e milioni te taata e ora nei, ei mo'a oia, ei Tamaiti Oia na te Atua Ora ra, Te Faaora Oia e te Fatu hoi oia, a te taata nei, te farii atoa nei te nunaa rahi ra ia'na, Tei Maitihia e Tei Faataa-hinuhia o te Metua,—oia te Mesia.

Te vai nei râ te hoê mau taata o tei farii ia Iesu ei taata maitai hau ê, ei hi'oraa maitai etc., etc. Aita râ ratou i farii ia'na e mea mo'a, e Atua hoi.

E toru ahuru e ma toru noa iho matahiti te maoro o to'na ora—raa i te ao nei ra i te pae tino ra; e e toru matahiti ana'e te maoro o to'na ohipa Orometua i mua i te mau taata ra. Aita rea e taata i ite maitai roa ia'na, e ua riro oia e taata tuiroo i muri iho i to'na poheraa. E mea poto roa te mau parau tei tae mai ia tatou nei no ta'na mau parau e ta'na mau ohipa. Noa'tu te poto o taua parau ra (Te Faufaa Apî) ua riro te reira te tao'a faufaa rahi i te ao nei. Aita rea e mau parau i papaihia no Iesu maori râ i papai

hia i roto i te Faufaa Apî. Mea iti roa te parau i reira no to'na tamariiraa e to'na paariraa.

Ua faateiteihia râ to'na io'a e te mau huru taata, te Chrititrano te Ati Iuda te Mohamada, e te taata faaroo ore, e te mau feia maitatai atoa, noa'tu to ratou haapaoraa.

I roto i to tatou haapiiraa nei, eita tatou e haamata i te tau i fanau mai ai Iesu i Betelahema e haamata râ tatou i mua'tu roa i te reira tau, oia hoi e haamata tatou i te feruri i te ohipa i ravehia e te Tamaiti Matahiapo na te Atua i roto i te mau Apooraa i te ao ra. I te tau hoi i maitihia'i oia, e i faa-toroa-hia'i oia ei Fatu e ei Faaora o to teie nei ao. O Iesu Mesia o Iehova ia te Atua no Adamu e no Noa; te Atua no Aberahama e no Itaata e no Iakobo. Te Atua hoi oia no Iseraela e te Atua hoi Oia no te mau peropheta mo'a o tei faaite ta'na parau i tera tau e i tera tau, e o Oia te arii o teie nei ao te Arii hoi o te mau arii e te Fatu o te mau Fatu.

TE ORARAA MATAMUA.

Ia au i te mau Papairaa Mo'a te faaite nei matou e, i vai na Iesu no Natareta i ô i te metua hou to'na fanauraa i te tino nei; e i taua oraraa matamua i maitihia'i oia, e i faatoroahia'i oia ei Fatu e ei Faaora no te utuafare taata nei.

I roto i te hoê orama i ite ai Ioane pipi here i te tahi mau ohipa i ravehia i te ao-varua hou teie nei ao. Na'na i ite i te au ore e te maroraa e te orure hau e te tama'i hoi i reira. Tera mai te tai'oraa i roto i te Apokalupo:

“E e tama'i tei nia i te ra'i: O Mihaela e ta'na ra mau melahi tama'i atura i te teni; e ua tama'i maira te teni e ta'na ra mau melahi. Aore râ i riro te rê ia ratou; e aore roa'tura o ratou e parahiraa i nia i te ra'i. Hurihia 'tura

hoi te teni rahi i rapae, o taua ophi tahito ra ïa, o tei parauhia o te diabololo ra, e o Satana hoi, o tei haavare i to te ao atoa nei; i hurihia oia i rapaa i nia iho i te fenua nei, e ta'na mau melahi atoa ua huri-atoa-hia i rapae."—Apokalupo 12: 7, 8, 9.

Tei taua oraraa varua i te matamua i oruri ai Satani i te hau o te Atua e ua pee te mau varua taata e raverahi i muri ia'na. O te mau melahi o te diabololo ratou tei tama'i atu i te mau melahi o te Atua, e ua hurihia mai Satani e taua mau varua haapao ore i raro nei e aore atura ratou i faatiahia ia fanau mai ei taata. Aore hoi ratou i faaoti maitai e i haapao hoi i to ratou oraraa matamua. E tai'o i te irava ono i te Episetole a Iuda:

"E te mau melahi atoa o tei ore i haapao i to ratou iho toroa ra, faarue ihora râ i to ratou parahiraa, o tei tapeahia ïa e ana i te fifi matara ore i raro a'e i te pouri, e tae noa'tu i te haavaraa i te mahana rahi ra."—Iuda 1:6.

O ratou tei haapao i to ratou toroa i te oraraa matamua e ua aro puai no te parautia ua roaa ïa ia ratou te ravea e tomo i roto i te oraraa piti nei.

Teie nei oraraa nei o te piti ïa o te oraraa, e te vai atura te tahi i muri a'e i te tia-faahou-raa ra.

Te mau mea ta Ioane i ite e i papai hoi ua iteahia ïa e te Peropheta Isaia e vau hanere matahiti hou te tau a Ioane.

Ua oto hoi oia i te mea ua mairi i raro o Eilela (Lucifero) mai nia mai i te ra'i. Te na ô mai ra to'na otoraa:—

"O to oe hoi mairi mai te ra'i mai, e Eilela, e te tamaiti a te poipoi e! o to oe hoi tâpûraahia i raro i te repo, e tei haavivî i te mau fenua nei e! Ua parau ra oe i roto i to aau ra e, E haere au i nia roa i te ra'i ra; e faateitei au i tau terono i nia' e i te mau fetia o te Atua ra; e parahi hoi

au i nia i te mou'a amuiraa ra, i te pae i apatoa ra: e a'e â vau i nia"e i te mau ata ra; e ia feito vau i Tei Teitei ra. E hopoi-roa-hia râ oe i raro roa i te tanuraa ra, i te hiti roa o te apoo ra."—Isaia 14: 12-15.

"E o teie atoa ta maua i ite e ua faaite hoi; i te hoe melahi no te Atua, o tei mana i mua i te aro no te Atua, o tei orure atu i i te Tamaiti fanau tahi; o tei herehia e te Metua ra, e o te vai i roto i te ouma no te Metua; e ua hurihia mai i raro, mai mua mai i te aro no te Atua e te Tamaiti, e ua parauhia oia e o te pohe mure ore; ua oto hoi te mau ra'i ia'na; o Eilela oia, e tamaiti na te poipoi. E ua hi'o maua, e inaha, ua mairi oia! ua mairi! oia hoi e tamaiti na te poipoi."—Buka Fafau 76:3.

No te mau parau i roto i te Buka Poe Tao'a Rahi i iteahia'i te tumu no te maroraa i te Ra'i. E no ta Isaia parau i ite ai tatou ua tamata o Lucifero i te roaa ma te au ore, i te tura rahi e te hanahana e te parahiraa teitei, e ua na ô ai oia ra; "E feito ia vau i Tei Teitei roa ra." Ua hinaaro o Satani ia riro oia ei Fatu e ei Faaora o to teie nei ao, e ua na ô maira oia i te Atua: Inaha, teie vau, a tono mai ia'u, * * * e na'u e faaora i te taata atoa e e ore hoi e moe te hoê; oia mau e na reira vau i te faaora ia ratou; no reira e horoa mai oe i to tura."


Ua na o mai ra râ te Tamaiti Matahiapo oia to tatou Fatu o Iesu: "Tau Metua, Ia haapaohia to oe hinaaro, e tei ia Oe te hanahana e a muri noa'tu." Ua maitihia hoi o Iesu ei Faaora no tatou e aore hoi te hinaaro o Lucifero i faatiahia. Riri roa ihora oia e ua orure hoi oia i te hau a te Atua.

Na teie nei mau parau i haapii mai e, i ora'i te Mesia e o Satani e te mau tiria tamarii-varau o te Atua atoa hoi hou te taata i tuuhia'i i nia i teie nei ao. I roto i taua ora-

raa matamua e mana to ratou e te maramarama hoi, e ua tiama hoi ratou ia haapao i to ratou iho hinaaro, e ia maiti hoi i te Aratai ta ratou e pee ai. E te tahi pae rahi hoi i pee i muri iho ia Satani.

Ua tuuhia te opuaraa paari a te te Atua no te faataa-taraa i teie nei ao i mua i to'na mau tamarii-varua ia ferurihia e ratou. E oaoa rahi roa to ratou i te mea e tomo ai ratou i roto i te oraraa piti ra e e noaa ia ratou i te tino tahuti. No to ratou oaoa rahi i arue amuitahi ratou. Tera mai te parau i roto i te Ioba 38:7 "A fatu atoa'i te mau fetia poipoi i te himene, e ua pii noa te mau tamarii atoa a te Atua i te oaoa?" E tai'o outou i te pae matamua o taua pene ra.

(E tuatihia mai teie parau.)



Te hoe vairaa buka teie i o te motu ra o Fiti (Figi). Na te hoe taata moni rahi o Andrew Carnegie i horoa noa taua fare ra i te mau taata maohi i Fiti. E riro paha e noaa te hoe fare vairaa buka i to Tahiti ia anihia.

TE MAU PARAU API

I roto i Titema ua pau i te auahi te hoê fare hoo tao'a tuiroo rahi i Paris, oia hoi te fare toa Bon Marche. Ua parauhia o taua fare toa o te fare toa roo rahi i te ao nei. E ono milioni dala te faufaa i pau i te auahi.

Te faaineine nei to Iapone e faakorona i hoê Emepera apî. Te maere nei te mau taata ra i te mau parau a te Iapone o tei na ô e; "Te mau taata matamua i te fenua Iapone e mau Atua ia e no ô mai ratou mai te miti mai e aore râ mai te mahana mai." Te na ô atoa mai ratou "O to ratou Emepera apî e huaai mau ia no taua mau Atua ra.

Te faatia faahou nei to te oire Messina i te fenua Sicily i ô i te pae au fenua Italia; i to ratou oire i pau i te ueue fenua. Te mau fare apî e mau fare tima ia (pua farani). Ua tuu-atoa-hia te tahi mau auri i roto i te tima a faatia-hia'i te fare e ia oti e mea paari roa te fare.

Te rave nei, te mau fare hamaniraa tiaa i Amarika, i te ohipa i te ao e te po, aore e faaearaa. Ua hanere te tausani pea tiaa i oti i te mahana hoê. Te tahi pae rahi o taua mau tiaa ra e haapono hia'tu i Europa.

Tei Amarika te hoê tamaiti apî maere rahi. E 14 te matahiti o taua tamaiti e to'na faito i teie e roaa e ono avae e pae initia te roa e te tupu noâ. To'na faito e 90 kilo e te tiahapa.

Ua pau e hoê milioni dala i te iore i te motu Jamaica. Amu noa te iore i te to tihota no reira taua faufaa i te paura.

Na te hoê totaïete pereoo auahi i faaïte maira ia tae te matahiti apî a opere oia i e piti hanere e pae ahuru tausani dala (250,000) i rotopu i tana mau taata rave ohipa. E horoa-noa-hia taua moni ra ei tavo'a aroha i te feia rave ohipa no taua totaïete ra.

—o—

I Taraformia na pohe a'enei te hoê vahine initia ruau roa. To'na matahiti a pohe ai oia e 125.

—o—

Ua paremo te hoê pahi auahi na te Iapone o Yasaka Maru to'na i'oa. Aore te hoê taata i phoe ua moe roa râ e hoê ahuru e ma piti milioni dala moni piru mau. E moni Iaponi ia.

—o—

E mea itoitoe roa te mau taata patoi i te ava i te imi i te ravea e opani i te mau fare hooraa ava i Amarika. Ia tae te mahana hopea o te matahiti nei oia hoi te 31 no Titema e i taua ihora po e opani-roa-hia te mau fare hooraa ava i roto i e ono mataïena rarahi. I roto i te tahi tufaa rahi o te hau Amarika e mea opani roa hia te inuraa ava, e aita hoi e mau fare hoo ava i reira.

—o—

I te 10 no Novema ua faakorohia te Emepera (Mikado) apî i Iapone. E toru ae hebedoma te maoro o taua oroa e te moni i pau e roaa e pae milioni dala.

Toaë a Maere, Faaau Parau,
Rue Dumont d'Urville, Orovini, Papeete, Tahiti.

Frank J. Fullmer, Imprimeur,
2532 Seventh East Street, Salt Lake City, Utah